

## Sa Carta de Variatio

A pustis de s'annu 2075 sos istùdios de archivistica fatos subra paperis agatados in un'apostu in su de duos pianos de s'Universidade "Nierorca Solbac" aiant bogadu a pigiu unu documentu chi aiat mudadu s'atinu de sa gente sarda. Difatis totus fiant firmos e cumbintos chi su chi contaia su Prof. Golostre in Orogun cun s'iscritu "Sa gherra de sa limba" de su 2051 fiat su contu prus làdinu e prus serente a sa realidade de totu cuddos iscritos dae sos àteros collegas. Ma pro more de s'impinnu de sa Professora Forroncra, chi aiat agatadu su documentu nou nùmenadu a pustis "*Sa Carta de Variatio*", su sentidu de sa gente aiat cumentzadu a mudare. No est chi s'iscritu de Prof. Golostre non fiat prus beru, ma s'Acadèmia e sa gente si fiant abbigiadas chi su professore de Orogun, nàschidu in Toloitai, no aiat contadu totu cantu. Una mancàntzia chi podiat èssere istada meledada; medas ingiurgiaiant difatis a su professore de èssere unu istandardizadore còmputo-ratzionale de sa banda nèuro-tzivile sighende sos inditos de su Prof. Longuvresu chi l'aiat pesadu in sos annos a pustis de sa Ganamanna acante a Piscaruja.

Sa Professora Forroncra, fèmina comomai de 96 annos cun tres bypass e sa clonazione de su figadu chi l'assicuraia de campare àteros sessanta annos, si fiat presentada a sa cunferèntzia de su 2076 aparitzada dae s'Acadèmia pro sa Limba in Totue cun su titulu "*La lingua di ieri e di oggi, uno sguardo rivolto al futuro: prospettive intimistiche, aspettative degli affetti e velleità folk-familiari*" In palas de issa unu ologramma bete mannu in frecuèntzia MhzΩ mostraiat a sos relatores e a sa gente fotos che a cussa de chimbe bandidos cun sa barba longa bestidos in costùmene ma cun in manos fusiles laser modellu 750/b de sa Japan&Brùvura, o che a cussa de ammentu wagnerianu de pipios gioghende in su portu (medas, custa manera de mostrare sas cosas, la mutiant Riappropriazione Identitaria). A costados de issa, àteros duos relatores de nomea internatzionale: Mediterraneo Elkann, nebode istimadu de Oceano Elkann cun s'argumentu; "*La lingua oggetto di studi: gli studi sugli studi degli studi sulla lingua sarda; ulteriori studi e ipotesi di studio*". S'àteru relatore fiat su Dutore Vladimir Vladimirovic Pellet cun sa relata: "*La lingua sarda davanti a una stufa o la lingua sarda davanti al caminetto? Le uniche tre differenze lessicali nelle borgate di Cala su Sonnu e Punta sa Lepa.*"

Unu mortòriu.

Ma sa gente fiat bènnida a trumas, amantiosa e mescamente disigiosa de intèndere a su mancu carchi faeddu in sardu. E giai fiant istados acumentados totus: in mesu de sa dibata fata in sa limba de Terramanna cada tantu istupaiat unu faeddu in sardu e totus lu acumpagiaiant ispantados cun àteros: "Ooh!" "Eeh!" "Umm!"

Bastu, petzi custu?

Emmo, sa limba sarda fiat debènnida gasi meda "limba de sos afetos" e gasi naturale chi fiat torrada a sos sonos chi bogant dae buca sos pipieddos: "*una bìnchida manna pro sa pedagogia sarda -aiat ammentadu una bia in su 2069 sa catedràtica Maria Pedagònia- chi in finis at isòrvidu de su totu su problema de su bilinguismu e de s'ufitzialidade sua in Sardigna*".

A s'acabu de sa cunferèntzia sa Professora Forroncra aiat bogadu dae una bugita su libru eletrònicu e aiat faeddadu de sa Carta de Variatio.

Sa Carta de Variatio est sa relata de acabu de su Prof. Orxus collega in s'Universidade "Neriorca Solbac" de su Prof. Golostre, membru de sa de Bator Commissiones pro sa Limba chi si nche fiat fuidu a pustis de su de noe adòbios pro andare a imparare a sos piseddos sa Mirabolimba de sa terra

de su Sole Creschente, ca li beniat prus fàtzile. Su documentu contat de sa cuntierra de s'istandard in manera diferente dae cussa de su collega Golostre mancari chi in unos cantos puntos s'assimigient :

[Mi l'ammento bene cussa pelea, fiat su de noe adòbios chi faghia, fia istracu de a beru e non nde cheria intèndere prus, ma pro comente fiant andende sas cosas e pro comente sunt acabadas, mègius gasi. Ma a acabare no est acabadu comente contat Golostre. No. No est gasi comente contat. Chi si nch'andet a bidere Sardegna Canta in inglesu! Cussa die de su 2050 in Siralak, in su de oto pianos de s'Universidade aiamus cumprèndidu sos isballios nostros, aiamus bidu in cara cuddu machiore chi aiamus fatu comintzare e chi non si fiat prus arrèghidu, e aiat sighidu in unu molinete de reformas chi nos aiat tragiadu a cussu atopu maladitu. Maladitos nois ca aiamus lassadu colare tropu tempus, maladitos nois chi no aiamus sighidu cussu chi giai aiamus agatadu. E imbetzes no! No! E lassa chi ti lasso, aiamus cunsentidu de isperimentare.

A primos, medas aiant pensadu a nde fàghere duos de istandard incoragiados fintzas dae su Ministeru de Terramanna in ue a ministru aiant postu a Vittorio Altare, grandu nemigu de s'ìsula sarda ca su mannoi aiat dèpidu pagare no isco cantas tassas pro contu de una nave chi teniat in cue e cun cussu dinari bogadu aiat pèrdidu una lotizzazione manna e su progetu pro fàghere de s'Asinara sa prima ìsula nucleare de Terramanna. Nos aiat mandadu una litera eletrònica chi nos naraiat: "Mi complimento con questa Commissione per la sensibilità con la quale affronta una materia così spinosa come quella del vostro Dialetto, siete sulla giusta strada, a molti parrà una scelta manichea ma noi del Ministero vi appoggeremo, alla parlata locale deve corrispondere anche quella scritta e questa scelta si avvicina di più alla vostra gente"

Prof. Arthur Bloch fiat istadu su primu a lassare sa Commissione. Dotzente famadu in totu su mundu si nche fiat dispedidu ammentende-nos unu de sos assiomas suos prus nòdidos: "Cando si comintzat a partzire sas cosas, no essint mai duos bìculos ebbia". Custu assioma a bias lu mutiat Effetto Dòmino (riferidu a su Ministeru in su sensu de su verbu dominare in prima pessone) e l'acumpangiaiat a sa lege de Murphy "Si carchi cosa podet andare male, l'at a fàghere".

Teniat resone.

In pagas dies unu Comitadu pro su Corpu de Gorgoena aiat presentadu ricursu in su TAR chi l'aiat dadu resone. S'in cras s'Assemblea delle Fricative Postvelari oteniat su nullaosta de su Ministeru. Tres dies a pustis, cando aia giai iscritu a su ministru Vittorio Altare una litera de chenscias mostrende-li sos pensamentos meos, sas Assembleas e sos Comitados naschiant che antunnas, istupaiaint che cardullinos dae cada logu, a bias fatos dae ses pessones a bias fintzas dae una. In una famiglia fiat comintzada una disamistade ca unu aiat bochidu su frade: non resessiant a si pònnere de acordu pro iscriere sa D cacuminale de su sambenadu issoro. Un'àteru si fiat bochidu a sa sola: teniat sa duda amlètica ca issu naraiat "aho" e fintzas "atho" e no ischiat comente l'iscriere.

Su ministru m'aiat dadu una risposta informale:

"Caro Orxus, ci conosciamo ormai da lungo tempo, so quali sono i tuoi timori, ma anche tu sai che i finanziamenti che vi arrivano sono parecchi, e poi, a dirla tutta, eri tu il primo a dire che ognuno doveva scrivere come parlava. Cerca una benedetta soluzione, in fondo quel Dialetto è il vostro, che ci posso fare io? Statti bene!".

Sa soluzione l'aiaimus agatada pro pagu tempus provende a iscriere cun s'alfabetu fonèticu internatzionale. Emmo, pro pagu tempus. Giustu duas chidas mi paret. Su tantu pro fàghere nàscheres sos Comitados pro su Denghe. Ca "ih!dimòniu?" non si naraiat cun su matessi denghe in

totus sas biddas, e comente si faghiat tando a ischire dae s'iscritu si cussu fiat de Gavoi, Baunei o Seulo?

A su ministru aia fatu notare chi fiamus acante a su trèmene de su paradosso:

“ma che paradosso e paradosso, siete unu laboratorio in continuo fermento -m'aiat respostu-studiosi internazionali già vi guardano con curiosità, continuate così. Al ministero arrivano attestati di stima per le nostre scelte democratiche, trova una soluzione Orxus, non vorrai farci fare brutta figura! O vuoi fare come quelli che al ministero non possiamo vedere, che si son presi i soldi e si son ripresi pure la loro Lingua e adesso scrivono tutti alla stessa maniera e parlano come cazzo gli pare. Quello sì che è un paradosso! Dai datti da fare.”

Aia aguantadu fintzas a su de noe adòbios de sa de Bator Commissiones, in su de oto pianos de s'Universidade fiamus petzi deo e Golostre e deo depia iscrivere su verbale a pitzu de sa relata de acabu de su collega meu, issu sa mea. Est tando chi aia retzidu s'ùrtima telefonada de su ministru Vittorio Altare:

”Orxus, conosci bene le direttive, il percorso è già avviato, non puoi fermarti proprio adesso, anzi non devi”

“Ma ministro Altare, quello che mi sta chiedendo è troppo, conosce bene la situazione mia e del Prof. Golostre, sarebbe una pazzia”

“Pazzia?! Prof. Orxus la richiamo all'ordine! Oramai deve arrivare fino in fondo, una pronuncia-una grafia è questa la strada intrapresa, lei deve scrivere quel verbale come si deve. Le intimo di farlo, questa è democrazia!”

“Ma ministro Altare...”

Su ministru aiat serradu sa chistionada gasi. Mi fiat partu de l'àere intesu fintzas righende. Deo aia castiadu a Golostre chi fiat prontu a faeddare, issu m'ampaniaiat belle dispiàghidu.

Su problema est chi Prof. Golostre achìchiat.  
E deo so limbidurche.”

Prof. Orxus  
Universidade “Nierorca Solbac”  
Silarak, su mese de sa bagna corriada 2062]